

ԲԱՆԱԽՈՍ

2000 04 05 Թիվ 35


2000 03 22

ՀՈՐՐՈՐԴ ԻՇԽԱՆՈՒԹՅՈՒՆԸ ՀԱՅԱՍՏԱՆՈՒՄ

ԱՐԱՄ ԱՐԱՐՅԱՅԱՆ
«Առավուտ» օրաթերթի գլխավոր խմբագիր

Արդյոք Հայաստանում կայացել է չորրորդ իշխանությունը: Այս հարցը շատ են սիրում խմբագիրներին տալ ժուռնալիստիկայի ֆակուլտետի ուսանողուհիները, որպեսզի մի տեղ պատասխանը գետեղելով, ստուգարք ստանան լրագրության պրակտիկայից: Եթե անկեղծ լինեն, այդ հարցին պետք է պատասխանեն բացասաբար: Եվ իմ բացասական պատասխանը ոչ մեկի համար սենսացիա չի լինելու: Ի վերջո, «չորրորդ իշխանություն» արտահայտությունը այլաբանություն է, մետաֆորիա, որը կոչված է ընդգծել լրատվամիջոցների կարելությունը, նրանց ազդեցությունը հասարակական կարծիքի վրա: Բայց նույնիսկ որպես այլաբանություն, չորրորդ իշխանության մասին կարելի է խոսել հստակ պետական համակարգի եւ զարգացած ժողովրդավարական ինստիտուտների պարագայում: Տասը տարվա ընթացքում, նույնիսկ գերմարդկային ճիգերի միջոցով, դա հնարավոր չէ անել: Մանավանդ Հայաստանում, որը խորհրդային փոքրիկ բեկորներից մեկն է եւ ի տարբերություն, ասենք, Էստոնիայի, գրեթե չուներ անկախ պետության եւ քաղաքացիական հասարակության ավանդույթներ:

Մինչեւ 1990 թվականը ընդհանրապես անիմաստ է խոսել ոչ միայն չորրորդ, այլեւ առաջին երեք իշխանությունների մասին: Կար մեկ գործադիր իշխանություն, որն իրականացնում էր կոմունիստական կուսակցությունը: Զարմանալի չէ, որ Երրորդ, 1990-91թթ. ստեղծված հանրապետությունում նույնպես ամենազարգացածը գործադիր իշխանությունն է, որը դարաբաղյան հաղթական պատերազմից հե-



տո ունի նաեւ վառ արտահայտված ռազմականացած բնույթ: Օրենսդիր իշխանությունը խորհրդարանը, 1995 եւ 1999 թվականներին ձեւավորվել է ոչ թե ընտրողների կամքով, այլ կառավարության վարչական եւ նյութական լծակներով: Դատական իշխանությունը, անկախ անցկացվող բոլոր բարեփոխումներից, շարունակում է դատախազության հետ միասին մնալ ամենակոռուպացվածը եւ, հետեւաբար, շատ խոցելի է նույն գործադիր իշխանության

«...Այսբանով հանդեռ, չի կարելի ասել, որ 2-5 հազար տպաքանակ ունեցող թերթերը որեւէ ազդեցություն չունեն հասարակական կարծիքի վրա».

մանիպուլյացիաների համար: Օրենսդիր եւ դատական իշխանությունները, հետեւաբար, շարունակում են մնալ գործադիր իշխանության կցորդը: Այս պայմաններում ինչպիսի՞ չորրորդ իշխանության մասին կարելի է խոսել: Մինչև նույն ժամանակ ոչ ոք չի պատրաստվում մտել եւ սպասել, մինչեւ իշխանության տարբեր թելերը իրարից տարանջատվեն, եւ գործադիր իշխանությունը զրկվի դոմինանտ դերից:

Ավելին, ազատ մամուլը իր էությանը կոչված է նպաստել նշված գործընթացների արագացմանը:

Այստեղ պարզապես արձանագրենք, որ լրատվամիջոցների կայացումը այս կամ այն չափով կախված է գործադիր իշխանության բարի կամքից՝ ցանկության դեպքում նա կարող է բռնությամբ, դատական հետապնդմամբ կամ տնտեսական ճնշմամբ շատ ծանր վիճակի մեջ դնել իրեն անհաճո լրատվամիջոցին: Պետք է ասել, որ այս տասը տարվա ընթացքում իշխանությունը այդ բարի կամքը ընդհանուր առմամբ դրսևորել է: 1998 թվականի փետրվարին տեղի ունեցած իշխանափոխությունից հետո շատ բաներ շտկվեցին: Շտկվեցին այն սխալները, որոնք թույլ էին տրվել անցյալում, մասնավորապես, օւլլատրվեց Հայ հեղափոխական դաշնակցության եւ նրա մամուլի գործունեությունը, շատացել են անկախ հեռուստաընկերությունները, բարձրացել է նրանց որակն ու ազատության աստիճանը, ավելի հազվադեպ են համակարգված բռնությունները խմբագրությունների դեմ: Որպես թերթի խմբագիր եւ «A1+» անկախ հեռուստաընկերության մեկնաբան, ես այս առումով չունեմ դժգոհության առիթներ: Բնական է, որ այս բարի կամքը մեծ չափով պայմանավորված է նաեւ արտասահմանյան վարկեր ստանալու իշխանության ցանկությամբ: Արեւմուտքը շատ մեծ ուշադրությամբ հետեւում է նորանկախ երկրների մամուլի ազատության հարցերին եւ մեծ չափով դրանց լուծմամբ է պայմանավորում իր վերաբերմունքը տվյալ պետության նկատմամբ:

Սակայն միայն սրտից բխած կամ Արեւմուտքի ճնշմամբ պայմանավորված իշխանությունների բարի կամքով, առանց համակարգային փոփոխությունների, չի կարող կայանալ չորրորդ իշխանությունը: Այստեղ կարող են դեր խաղալ չորս տիպի գործոններ. արտաքին ազդեցությունը, մամուլի արժանահավատությունը, անաչառությունը եւ գաղափարախոսությունը, որոնք կփորձեն հետեւողականորեն դիտարկել:

Արտաքին պայմաններ

Չորրորդ իշխանությունը կարելի է համարել կայացած այնքանով, որքանով այն հաջող, բարգավաճող բիզնես է: Ոչ միայն թերթի խմբագիրը, այլեւ ցանկացած մանր բիզնեսմեն գտնվում է այս

առումով ծանր վիճակի մեջ: Իհարկե, չվերցնելով «TV ալիք» կամ «Եթեր» թերթերը, որոնք կարելի է հաջող բիզնես համարել, բայց չորրորդ իշխանությունն չեն, քանի որ հասարակական գործոն չեն: Մնացած հասարակական-քաղաքական թերթերը մեզանում չեն կարող հաջող բիզնես լինել առնվազն երեք պատճառով: Առաջինն այն է, որ ժամանակակից հայաստանի ընթերցողը ի վիճակի չէ իր միջոցներով պահել այդ թերթերը, որոնք այժմ արժեն հատը 100 դրամ, այսինքն այնքան, որքան կես կիլոգրամ հացը: Համեմատության համար ասեն, որ կոմունիստական շրջանում հացը արժեր 30 կոպեկ, իսկ թերթը՝ 2: Բնականաբար, նվազագույն աշխատավարձը 5000 դրամը կարելի է ամբողջությամբ ծախսել ընդամենը ամիսը երկու անուն թերթ գնելով, սակայն այդպես ոչ ոք չի վարվում: Իհարկե, դրանով է պայմանավորված թերթերի ցածր տպաքանակները, եւ, հետեւաբար, մեր գործունեության տնտեսական անարդյունավետությունը: Ցածր տպաքանակների մյուս պատճառը փոստային բիզնեսի քայքայված վիճակն է, երբ բացակայում է թերթը ընթերցողի բնակարան հասցնելու ծառայությունը: Ինձ՝ որպես թերթի խմբագիր, օրական 2-3 հոգի է զանգահարում, որոնք պատրաստ են վճարել այդ 2,5 հազար դրամը, նաեւ՝ հավելյալ 500 դրամ՝ որպեսզի դուրս չգան տնից եւ տանը, ինչպես քայքայումից առաջ էր, կարողանան ստանալ թերթերը: Մեր փոստային ծառայությունների վատ բիզնեսը, այսինքն այդ հնարավորությունը չօգտագործելը (նրանք հաստատ կարող են փոքր գումարներ ներդնելով այդ բիզնեսը զարգացնել) հանգեցնում է, որ մեր ընթերցողների թիվը պակասում է:

Թերթերի անշահութաբերության եւ հակառակը՝ տնտեսական վնասաբերության երրորդ պատճառն այն է, որ մեր տնտեսության շուկան եւ ազատ մրցակցությունը այն չափով զարգացած չեն, որ անհրաժեշտություն զգան մեծ քանակով եւ բարձր գներով թերթերում գովազդ տպագրելու: Այստեղ պարբերաբար, ինչպես գիտեք, գալիս են ադրբեջանցի լրագրողները եւ հայտնի է, որ այնտեղ գո-



Արամ Արղաշանյանը ծնվել է 1960 թվականի փետրվարի 17-ին, Երեւանում: 1983 թ. ավարտել է Երեւանի Կոմիտասի անվան պետական կոնսերվատորիայի երաժշտագիտության բաժինը: 1988-ին «Երաժշտական արվեստ» մասնագիտությամբ պաշտպանել է արվեստագիտության բեկնածուի թեզը: 1983-1991 թվերին աշխատել է Գիտությունների ակադեմիայում սկզբից որպես գիտաշխատող, այնուհետեւ որպես գիտքարտուղար: 1991-1992 թվերին «Ա1» անկախ ստուդիայի գլխավոր խմբագիրն էր: 1992-1994 թթ. աշխատել է նախագահի աշխատակազմում, սկզբից ՀՀ նախագահի մամուլի քարտուղարի տեղակալ, այնուհետեւ՝ որպես մամուլի քարտուղար: 1994 թվականից «Առավոտ» թերթի գլխավոր խմբագիրն է: Ամուսնացած է, ունի 3 երեխա:

վազդի գինը 10 անգամ ավելի թանկ է, քան Հայաստանում: Դա ինչ-որ չափով կարող է խոսել նաև այդ երկրի տնտեսական զարգացվածության մասին:

Վերջապես, չորրորդ պատճառը մեր երկրի հարկային օրենսդրությունն է, ըստ որի իմ լրագրողին 100 դոլար աշխատավարձ տալու համար ես ստիպված եմ տարվա առաջին ամիսը ծախսել 138 դոլար, իսկ տարվա վերջում, երբ 38% գանձվում է 1200 դոլարից, տվյալ աշխատողի աշխատավարձից ոչինչ չի մնում: Այս վիճակում են, բնականաբար, ոչ միայն թերթերի խմբագիրները, այլ ցանկացած փոքր բիզնեսով զբաղվող մարդ: Աշխատողին 100 դոլար օրինական ճանապարհով վճարելը թե թերթերի, թե փոքր խանութների, կրպակների, թե ցանկացած մանր բիզնեսով զբաղված մարդկանց բյուջեի համար քայքայիչ է:

Վերը թվարկած երեք արտաքին գործոնների ազդեցության տակ բոլոր թերթերն ստիպված են փնտրել հովանավորներ, որոնք կոչված են ծածկելու նրանց տնտեսական գործունեության անշահութաբերությունը: Եվ քանի որ ոչ ոք հենց այնպես փող չի տալիս, ապա նման հովանավորների առկայությունը այս կամ այն չափով կաշկանդում է խմբագրությունների գործունեությունը: Ճիշտ է, կոնկրետ « Առավոտը» փորձում է գտնել այնպիսի գործարարների, որոնք չունեն վառ արտահայտված քաղաքական շահեր եւ պարզապես շահագրգռված են, որ Հայաստանը զարգանա ազատական, ժողովրդավարական արձանական բարեփոխումների ճանապարհով: Կան մարդիկ, որոնց հայացքը համընկնում է մեր հայացքների հետ եւ այդ պատճառով մեզ հարմարվելու մեծ ճիգեր պետք է: Բայց կան ուրորտներ, որտեղ ստիպված ես ավելի նրբանկատ, ավելի զգուշավոր լինել, եւ դա, ինչ խոսք, ազատության սահմանափակում է: Այն թերթի խմբագիրը, որը ասում է (կրկնեմ, խոսքը ոչ թե «Եթերի» կամ «TV ալիքի» մասին է), թե աշխատում է ինքնաֆինանսավորմամբ, պարզապես ստում է: Իսկ մի իշխանություն, նույնիսկ չորրորդ, որը սահմանափակվում է դրսից ներհոսող գումարներով, լիակատար լինել չի կարող: Եթե վերցնենք մակրո մակարդակը, ապա Հայաստանի իշխանությունը, ենթադրեմք գործադիր, նրա գործունեությունը, բյուջեի ազատականությունը նույնպես սահմանափակվում են նրանով, որ բյուջեի կեսը կազմված է, ասենք, Համաշխարհային բանկի կամ ԱՄԳ-ի գումարներից:

Մինչեւ չունենանք իսկապես ազատ եւ զարգացած տնտեսություն, եւլքն, անշուշտ, այս փուլում ԶԼՄ-ներին որոշակի տնտեսական արտոնություններ տալն է: Նման ուղղվածության օրենք, որի իմաստը լրատվամիջոցներին եւ նրանց հարակից ոլորտներին, այսինքն՝ թղթի, «Հայամուլի», տպարանի ավելորդ հարկերից ազատելն է, մենք փորձում ենք մշակել եւ ներկայացնել Ազգային ժողովին:

Այսբանով հանդերձ, չի կարելի ասել, որ 2-5 հազար տպաքանակ ունեցող թերթերը որեւէ ազդեցություն չունեն հասարակական կարծիքի վրա: Այնուամենայնիվ, հասարակության ակտիվ, պասիվնար մասը թերթեր գնում է եւ թերթերի գրածներով հետաքրքրվում: Խոսքը, մասնավորապես, քաղաքական եւ տնտեսական վերնախավի, խոշոր բյուրոկրատիայի, գործատուների մասին է: Նրանց միջոցով, այսինքն՝ միջնորդավորված ձևով, տպագիր լրատվամիջոցներն, այնուամենայնիվ, ազդում են թե ավելի լայն զանգվածների եւ թե, ինչ-որ չափով, ներքաղաքական վիճակի վրա:

Բայց պետք է նաև ընդունել, որ մենք լրագրողներս, առայժմ չենք օգտագործում մեր բոլոր ներքին ռե-

սուրսները չորրորդ իշխանություն դառնալու համար: Հենց դրանց մասին եմ մտադիր խոսել:

Արժանահավատություն

Եթե ուզում ես, որ քեզ վստահեն, եթե ուզում ես, որ մարդու վրա ազդեցություն թողնես, ապա պարտավոր ես արժանահավատ լինել: Մամուլի եւ նաև մեր թերթի կարելու թերություններից է արժանահավատության պակասը: Այստեղ կան թե օբյեկտիվ, եւ թե սուբյեկտիվ պատճառներ: Սկսեմ առաջիններից: Մենք առայժմ չենք սովորել փաստերի հետ աշխատել այնպես, ինչպես դա անում են մեր արեւմտյան գործընկերները: Լսելով որեւէ փաստի մասին, լրագրողը, եթե դա իր կարծիքով հետաքրքրություն է ներկայացնում կամ համապատասխանում է իր ներքին սուբյեկտիվ համոզմունքներին, անմիջապես զետեղում է այն թերթում: Օրինակ, եթե ես ներքուստ վստահ եմ, որ բոլոր ոստիկանները կաշառակեր են, ապա իմ մեջ ներքին դիմադրություն չի առաջացնի այն լուրը, թե ոստիկանության այս կամ այն աշխատողը կաշառք է վերցրել: Լրագրողն իրեն նեղություն չի տա պաշտոնական եւ անպաշտոն, ուղղակի եւ անուղղակի աղբյուրներից ճշտելու լուրը: Դրա համար անհրաժեշտ են մեծ ջանքեր եւ որոշակի ժամանակ: Իսկ նա պետք է վազի հաջորդ ասուլիսին կամ հաջորդ հարցազրույցին: Օրինակ, եթե այսօր Հայաստանում տեղի ունենալին շատ կարելու 100 իրադարձություններ, ապա այն գործընկերները, որոնք պատիվ են արել այսօր գալ այստեղ լսելու իմ դա-

«Բոլոր թերթերը ստիպված են փնտրել հովանավորներ, որոնք կոչված են ծածկելու նրանց տնտեսական գործունեության անշահութաբերությունը»:

սախտությունը, չէին գա:

Ի դեպ, ասուլիսն ու հարցազրույցը շարունակում են մնալ լրատվամիջոցների գերիշխող ժանրը, ինչն ինքնին չի բարձրացնում մամուլի ազդեցությունը: Վերաշարադրելը ասուլիսում ասվածը կամ հարցազրույցում արտասանածը վերծանելը դարձել է մեր հիմնական աշխատանքը: Եվ քանի որ հեռուստաընկերությունները օպերատիվ են աշխատում, ընթերցողը որեւէ ցանկություն չունի այդ նույն խոսքերը, նույն ձեւակերպումները հաջորդ առավոտ կարդալ թերթերում: Տպագիր լրատվամիջոցներից ընթերցողն ուրիշ բաներ է սպասում: Նրանք ցանկանում են, որ մենք փոքր ինչ ավելի խորանանք նույն ասուլիսին հնչած խնդիրների մեջ, եւ դրանք ավելի բազմակողմանի ձեւով ներկայացնենք հասարակությանը: Ընթերցողները չեն ցանկանում, որ մենք բոլոր լուրերը քաղենք Ազգային ժողովից, ժայրահեղ դեպքում կառավարությունից եւ նախագահական նստավայրից, պատկերացում չունենալով, թե էլ որտեղ կան մարդկանց հուզող խնդիրներ: Իհարկե, նման մակերեսայնության եւ փակ, քաղաքականացված լրագրողական շրջանակի սահմանափակության խնդիրները լուծել կարելի է միջոցների, ժամանակի եւ մարդկանց քանակը ավելացնելով: Եթե ես պետք է համոզարարեմ ենթադրեմք էլեկտրական բաշխիչ ցանցերի խնդրով, մեկ շաբաթ զբաղվել որեւէ լրագրողի, ապա չեմ կարող այդ շոյությունը ինձ թույլ տալ, որովհետեւ այդ լրագրողը պետք է օրական 1-1.5 էջ գրի օրվա իրադարձությունների մասին: Ինքն էլ գրում է նույն հարցազրույցների, ասուլիսների, Ազգային ժողովից ստացած լուրերի հիման վրա: Բայց նույնիսկ միջոցների պակասության պայմաններում, ես լրագրողների եւ առաջին հերթին խմբագիրների վրայից մեղքը չեմ համուս, որովհետեւ հենց մեզ մոտ է պակասում պրոֆեսիոնալիզմը եւ երեսակայությունը:

Անդրադառնալով արժանապատվության պակասի օբյեկտիվ պատճառներին պետք է նշել, որ պետական գերատեսչությունները որպես կանոն խիստ անբարյացակամ են լրատվամիջոցների նկատմամբ: Ընդ որում,

որքան ցածր է տվյալ պաշտոնյայի կարգավիճակը, այնքան մեծ է նրա հավակնությունները մամուլն արհամարհելու եւ դրանով ինքնահաստատելու: Լրագրողների համար չափազանց դժվար է որեւէ տեղեկատվություն ստանալ այդ գերատեսչությունից, այնտեղ տվորաբար աշխատում են ոչ պրոֆեսիոնալ եւ լրատվություն տալու ցանկություն չունեցող մարդիկ: Սարդիկ, որոնք տվյալ նախարարի կամ փոխնախարարի ծանոթներն են, որոնք իրենց պարտքն են համարում ոչ թե մատուցել այլ թաքցնել լրատվությունը: Պետական բարձրաստիճան պաշտոնյաներն իրենց լրատվակենտրոններով համոզված են, որ զբաղվում են խիստ կարելուր պետականաստեղծ աշխատանքով, իսկ մենք ուղի տակ ընկնելով խանգարում ենք նրանց աշխատանքը եւ ինչ-որ անիմաստ հարցադրումներ առաջադրում: Մի օրինակ բերեմ: Կառավարության լրատվության պաշտոնյային մեր լրագրողը հարցնում է չափազանց անմեղ եւ, իմ կարծիքով, բնականոն հարց. «Այսօր վարչապետը հանդիպե՞լ է Միասնություն դաշինքի հետ»: Պատասխանը. «Այդպիսի հարց կտա՞ն, բա դու չե՞ս ամաչում այդպիսի հարցից: Քո ի՞նչ գործն է, հանդիպել է, չի հանդիպել, ուզել է՝ հանդիպել է, չի ուզել՝ չի հանդիպել»: Կարծես թե նրա ինտիմ կյանքի մասին հարցեր ենք տալիս: Սա չափազանց տարածված պրակտիկա է լրատվական կենտրոններում: Այս պայմաններում չափազանց դժվար է լրջորեն օգտվել պաշտոնական աղբյուրներից, որն անշուշտ, ազդում է տեղեկատվության արժանապատվության վրա:

Անայառություն

Մի կողմից, այո, մենք պետք է փորձենք օբյեկտիվ լինել, այսինքն, կարողանանք առանց նախապաշարումների լսել եւ թերթերում գետեղել տվյալ խնդրի շուրջ տեղի ունեցող բոլոր փաստարկները: Դա ունի նաեւ պրագմատիկ նշանակություն: Տեսականորեն կարելի է ենթադրել, որ թերթը շահում է, եւ ընթերցողների քանակը շատանում է, երբ նրանց վզին չի փաթաթվում որեւէ տեսակետ եւ նրանք տեսնում են, որ տվյալ լրատվամիջոցը զուրկ է ազդեցիկ քարոզչական շեշտադրումներից: Ավելին, ես հնարավորություններիս չափով փորձում եմ գերծ պահել ինձ, իմ աշխատակիցներին եւ, որն ավելի դժվար է, իմ հեղինակներին հուզական դրակումներից, քննարկական զեղումներից, չափից դուրս վառ արտահայտած անձնական վերաբերմունքից: Դա, անշուշտ, բարձրացնում է թերթի վարկը, լայնացնում ընթերցողների շրջանակը: Բացի այդ, նման մոտեցումը համապատասխանում է ընդհանրապես ազատամտության, բաց հասարակարգի սկզբունքներին, որոնք մենք փորձում ենք դավանել: Բայց կա հարցի մյուս կողմը: Մեր առայժմ չկայացած հասարակությունում ցանկացած մտավորական, այդ թվում նաեւ լրագրող, պարտավոր է ունենալ եթե ոչ քաղաքական հայացքների համակարգ, ապա ինչ-որ արժեքներ, որոնք նա հասցնում է հասարակությանը: Դրանք կարող են լինել զուտ մարդկային, քարոյական համոզումներ, որոնք կախված չեն քաղաքական նախասիրություններից: Օրինակ, մենք գտնում ենք, որ թերթը պետք է պահպանի ընկածին չխախելու սկզբունքը, չհարվածի նեղության մեջ գտնվողին: Որովհետեւ առանց այդ էլ ստրեսային վիճակում գտնվող, 1992-94 թթ. սարսափելի տարիները տեսած ժողովրդին ավելի նյարդայնացնելը, չարությունը, վրեժխնդրությունը էլ ավելի բարձրացնելը ոչ մի օգուտ չի բերի ոչ քարոզողին, ոչ իշխանությանը, ոչ ընդդիմությանը, եւ ոչ էլ որեւիցե մեկին: Ուստի, մենք խուսափում ենք այն մյուսներից, որոնք միտված են էլ ավելի ոչնչացնելու, նվաստացնելու, ասենք, Վանո Սիրադեղյանին, Աշոտ Բլեյանին, Ալեքսան Գարությունյանին: Եվ ընդհակա-

ռակը, ես քաջալերում եմ, երբ նեղ վիճակում գտնվող մարդկանց մասին համարձակվում են ասել որեւէ բարի խոսք:

Ինչպես տեսնում եք, հիշատակված գործիչները պատկանում են տարբեր քաղաքական հոսանքների, բայց նրանց հակառակորդները, բնականաբար, պետք է դժգոհ լինեն մեր այս մոտեցումից: Բայց տվյալ դեպքում մենք ավելի կարելուր ենք համարում հասարակությանը որոշակի բարոյական սկզբունքների մատուցումը, նույնիսկ այդ հասարակության մի մասի արյունատենչությանը հակադրվելու գնով:

Կցանկանայի խոսել մի խնդրի մասին, որն, ըստ իս, խոչընդոտում է չորրորդ իշխանության կայացմանը: Բանն այն է, որ ոչ միայն ազգային հեռուստաընկերությունը, որի մասին շատ է խոսվում, այլ անկախ եւ կուսակցական լրատվամիջոցների զգալի մասը այսպես թե այնպես գտնվում է նախագահ Ռոբերտ Քոչարյանի վերահսկողության ներքո, փաստորեն, մաս կազմելով պետական քարոզչական մեքենայի: Եվ քանի որ վերջին երկու տարվա ընթացքում թե դարաբաշյան հարցի լուծման, եւ թե սոցիալ-տնտեսական բնագավառում որեւէ առաջընթաց չի գրանցվել, այդ քարոզչական մեքենայի գլխավոր ռազմավարությունն է բոլոր դժվարություններն ու ծախսերը մեղքացատրել ավելի քան երկու տարի առաջ իշխանությունից հեռացած մարդկանց քաղաքականությամբ: Այս մոտեցումը, ինչ խոսք, զուրկ չէ տրամաբանությունից, այսօրվա համակարգի սաղմերը կային նաեւ անցյալում, բայց ռետրոսպեկտիվ քննադատության վրա կենտրոնանալը բազմաթիվ լրատվամիջոցների, ցավոք, զրկում է այսօրվա հրատապ խնդիրների բանական, քննական քննարկման հնարավորությունից: Կաղը այն թերթերում, որոնք պաշտպանում են նախագահ Ռոբերտ Քոչարյանի տեսակետը, դուք կկարդաք, որ Արկադի Դուկասյանի վրա կրակել է ԳԳԸ-ն:

Խորհրդային Միության հակահրեական հերթական հիստերիայի ժամանակ տարածված էր այսպիսի մի ասույթ. «Եթե ծորակում ջուր չկա, ուրեմն հրեաներն են խմել»: Այսօրվա նախագահամեն քարոզչական մեքենայի նմանատիպ հիստերիան, որը ծավալված է նախորդ իշխանության դեմ, տուրք է տալիս հասարակության լյուսպենացված զանգվածի վրեժխնդրությանն ու ատելությանը: Ուստի որոշ չափով դա նաեւ պոպուլիստական է: Դասատանում հիմնականում կա երկու կայացած թերթ, որոնք հակադրվում են այդ ընդհանուր հոսանքին՝ «Առավոտը» եւ «Հայկական ժամանակը»: Բնականաբար, հակադրվելու պայմաններում լիակատար անջատությունը դժվար է պահպանել: Իսկ հակադրվելու պատճառները սկզբունքային են եւ կապված են գաղափարախոսության հետ:

Մարգրետ Թետչերը մի առիթով ասել է. «Ես չգիտեմ մի որեւէ շահ, բացի մարդու եւ նրա ընտանիքի շահերից»: Բավականին դաժան է ասված, բայց եթե փորձենք խորանալ այդ ասվածի մեջ, ապա խոսքը մեզանում շատ տարածված երեւույթի մասին է: Երբ խոսքը վերաբերվում է հասարակության, ազգի շահերին, ապա միշտ կարող է հայտնվել որեւէ մեկը, որը դա բոլորից լավ գիտի: Եվ երբ նա բոլորից լավ գիտի, որովհետեւ մնացածը տոգետ են, զարգացած չեն, չգիտեն հասարակության եւ ազգի շահերը, նա կարող է բռնությամբ իրականացնել այն քաղաքականությունը, որը ճիշտ է համարում:

Մեր հասարակությունում ժամանակ առ ժամանակ բանավեճեր են բռնկվում ազգային գաղափարախոսության մասին: Ենթադրվում է, որ կա մարդկանց մի

«Թերթը հայտարարությունների տախտակ չէ, որպեսզի այնտեղ տեղադրվեն ցանկացած տեսակետներ»:

խումբ, որը գիտի, թե դա ինչ է եւ, նույնիսկ, ձեւակերպել է, իսկ ազգի մնացած մասը այնքան խակ, տգետ է, որ այդ ճշմարտություններին առայժմ չի հասել: Եթե ես գիտեմ, թե որն է ազգի շահը, իսկ մնացածները չգիտեն, ապա կարող եմ անել հաջորդ քայլը եւ ստիպել, որ իմ տգետ ազգակիցները, որոնք, իմ կարծիքով, իրենց շահը չեն հասկանում, անեն ինչ ուզում եմ:

Այդպիսի գաղափարախոսությանը մենք դեմ ենք: Մենք վստահ ենք, որ ժողովրդավարության հասարակարգում պետք է լինի ինչպես ապրանքների եւ ծեռնարկությունների, այնպես էլ գաղափարների ազատ մրցակցություն: Իսկ չորրորդ իշխանության ֆունկցիան այդ մրցակցությունն ապահովելն է: Բայց որքան էլ լայնախոս լինի թերթի խմբագիրը, որքան էլ փորձի իր թերթի շեղում տեղադրել բոլոր գաղափարները, տեխնիկապես հնարավոր չէ եւ դրա անհրաժեշտությունը չկա: Ի վերջո, թերթը հայտարարությունների տախտակ չէ, որպեսզի այնտեղ տեղադրվեն ցանկացած տեսակետներ: Թերթը բոլոր դեպքերում ունի ուղղվածություն, որը եւ տարբերում է թերթերի մի խումբը մյուս խմբից: Ինչո՞ւ են տարբերվում թերթերը մեզանում. երկու հիմնական սկզբունքով: Առաջին սկզբունքը վերաբերումն է պետության հանդեպ: Խորհրդային տարիները մեզանում մշակել են պետության հանդեպ որպես խիստ, բայց արդար հոր նկատմամբ վերաբերմունք: Նա մեզ թույլ է տալիս ինչ-որ բաներ ունենալ, երբեմն թխվածք է տալիս, մեզ կուրծք է տալիս, ստիպում է, որ մենք չարություն չանենք: Այդպիսի պահանջներ պետության հանդեպ մեզանից շատերը պահպանել են առ այսօր: Ինֆանտիլիզմ փոքր երեխայի վերաբերմունք պետության հանդեպ. ե՞րբ եմ ես լավ ապրելու, տուր, որ ես լավ ապրեմ: Այս վերաբերմունքը պետության հանդեպ մեզանում գերիշխող է եւ պահպանում են մեր թերթերից շատերը: Զարգացած հասարակության վերաբերմունքը այլ է. ես հասուն մարդ եմ, ոչ մեկից կոնֆետ չեմ խնդրում, իսկ պե-

տությունն իմ թիկնապահն է: Հասուն մարդը պետության նկատմամբ բոլորովին այլ վերաբերմունք ունի, նա պատասխանատու է իր, իր ընտանիքի բարեկեցության համար: Օրինակ, կոնկրետ ես, տասը տարվա ընթացքում հասել եմ ինչ-որ հաջողությունների: Երբ ես հասնում եմ հաջողությունների, բնականաբար ասում եմ, որ դա իմ տաղանդի, աշխատասիրության շնորհիվ է: Բայց եթե ես չհասնեի այդ հաջողություններին, չէի ասի, որ անտաղանդ, անաշխատասեր կամ ծույլ եմ: Ես կասեմ հանցավոր ռեժիմն է մեղավոր, այդ պատճառով եմ տառապում: Անա այս տարբերությունը կա պետության նկատմամբ: Հասարակական ինֆանտիլիզմը բնականաբար շահագործվում է քաղաքական գործիչների կողմից: Այդ ինֆանտիլիզմից ազատվելու ձգտումը համարում եմ մեր թերթի եւ նրա ուղղվածության թերթերի առաքելությունը:

Երկրորդ տարբերությունը, որով բաժանվում են թերթերը, ազգի նկարագրի եւ հեռանկարների տարբերությունն է: Ասենք, ամերիկյան ֆիլմերում, հարյուր անգամ մեքենայի տակ ընկած, հազար անգամ վառված եւ վայր ընկած զվառվոր հերոսին մոտեցած ընկերուհին հարցնում է. «Are you OK?», այսինքն՝ լա՞վ ես: Ինչ կաներ հայ հերոսուհին: Նա կասեր. «Վայ, քոռանամ ես, վայ, ի՞նչ պիտի անեմ» եւ այլն, եւ այլն: Այստեղ կենսունակ եւ ոչ կենսունակ ազգերի տարբերությունն է: Լավ կանությունը, որը բոլորովին մեր ազգի առանձնահատկությունը չէ, այլ ներարկվել է 1960-70-ական թվականների խորհրդային մտավորականության կողմից, մենք փորձում ենք համել: Մենք բոլորովին տառապալի չենք, մենք, ի վերջո, հաղթած ենք: Այդ դրական վերաբերմունքը կյանքի նկատմամբ նույնպես փորձում ենք մտցնել հասարակական գիտակցության մեջ:

ՀԱՐՑԵՐ ԵՎ ՊԱՏԱՍԽԱՆՆԵՐ

Ի՞նչ դեր ունի հայկական մամուլը Հայաստան-սփյուռք կապերում:

- Այդ ուղղությամբ, մենք ցավոք սրտի, քիչ ենք աշխատում: Եթե դրանում միայն մամուլին ձեռնդրենք, երեւի ճիշտ չի լինի, որովհետեւ ես առ այսօր չեմ պատկերացնում, թե ինչ ռազմավարություն է որդեգրել մեր պետությունն այս կարեւորագույն հարցում: Մարդիկ հավաքվում են Սարդարապատում, խմում են, կենացներ ասում, թե մենք մի ազգ ենք եւ այլն, հետո բաժանվում են առանց գործնական մոտեցումների: Եթե լինեն գործնական մոտեցումներ, մենք մեծ հաճույքով դա կլուսաբանենք, կարողապահանջենք: Կարծում եմ, ընդհանուր այդ դեկլարացիաներից պետք է զնայ ինչ-որ կոնկրետ ուղղություններով: Կա՞ն սփյուռքահայ իրավաբաններ, որոնք կարող են ստեղծել ազատական, լիբերալ քաղաքական դաշտ, օգնել, որ մեր Ազգային ժողովը դա ստեղծի՞ այդ: Կա՞ն հասարակության հետ սփյուռքների մասնագետներ, որոնք կարող են օգնել, որ մենք քարոզչություն տանենք մեր ազգային խնդիրներով՝ կամ: Այսինքն, ավելի կոնկրետ, ավելի փոքր խմբերով թող աշխատեն, եւ մենք այդ աշխատանքը հաճույքով կլուսաբանենք:

Ի՞նչ կարծիքի եք դասական ուղղագրությունը որպես մեկ միասնական համակարգ ընդունելու մասին:

- Առաջ այնպիսի պատրանք կար, որ Հայաստանն ոչ սփյուռքը պետք է վերջնականապես միաձուլվեն եւ իրարից ոչ մի բանով չտարբերվեն: Եթե նրանց հարմար է դասական ուղղագրությունը, թող օգտագործեն, յուրաքանչյուր գրագետ մարդ Հայաստանում այն կկարդա: Եթե մեզ հարմար է խորհրդային ուղղագրությունը, եկեք օգտագործենք, եւ սփյուռքում ցանկացած գրագետ մարդ մեզ կկարդա: Պետք չէ այդ պրոպեղանդ ծանրաբեռնել մեր առանց այդ էլ դժվար կյանքը:

Եթե դուք լինեիք կաշառակերության դեմ պայքարի մախարար, ո՞րը կլիներ ձեր առաջին հրամանը:

-Նախ եւ առաջ ասեմ, որ երբեք չեմ լինելու ոչ մախարար, ոչ պատգամավոր: Այդ իսկ պատճառով չեմ կարող ասել, թե կաշառակերության դեմ պայքարի մախարարություն պե՞տք է, թե ոչ: Եթե կառավարության տարբեր օղակներ, դատախազությունը, մերքին գործերի մախարարությունը առանց որեւէ հա-

տուկ մախարարության, առանց արտակարգ հանձնաժողովի իրենց մասնագիտական պարտականությունները կատարեն, անեն ինչ լավ կլինի:

Թե՞րթն է Ձեզ ավելի հոգեհարազատ, թե՞ հեռուստատեսությունը: Համաձայն եք, որ տպագիր մամուլը գնում է մահացման:

- Առայժմ չեմ կարծում, որ գնում է մահացման, բայց պատմական հեռանկարում կարծում եմ, ինտերնետի զարգացմանը զուգահեռ, տպագիր մամուլը, որպես թղթի վրա տպված մամուլ, իսկապես կամաց-կամաց կգնա ոչնչացման: Բայց իմ սերնդին կբավարարի այդ շրջանը, որ մենք շարունակենք թերթ տպել: Ինձ ավելի հոգեհարազատը հեռուստատեսությունն է, որովհետեւ եթեքը տալիս է բոլորովին այլ զգացմունքներ, այլ էյֆորիա: Դա թմրամիջոցի նման մի բան է, որից մարդը դժվարությամբ է բաժանվում:

Մարտի 22-ին Արցախում կատարվածը համարու՞մ եք Հայաստանում հոկտեմբերյան իրադարձությունների արձագանքը:

-Իհարկե, համարում եմ:
Ինչպե՞ս եք գնահատում լրագրողների մասնագիտական կազմակերպությունների գործունեությունը:

-Ես չեմ մտնում ոչ մի լրագրողական մասնագիտական հասարակական կազմակերպության մեջ: Սակայն, եթե հայ մարդիկ կարողանում են իրենց կազմակերպել, արտասահմանից ստանալ ինչ-որ շնորհներ եւ դրանցով ապրել, ապա ես դա միայն ողջունում եմ:

Ձեր կարծիքով, կա՞ արդյոք պետական լրատվամիջոցների անհրաժեշտություն:

-Ոչ, պետական լրատվամիջոցների անհրաժեշտություն չկա: Բազմիցս ասել եմ, որ մասնավորապես անհրաժեշտություն չկա պետական հեռուստատեսության: Դա իսկապես բոլշեւիկյան շրջանի մնացորդ է: Այն խնդիրները, որոնք վերջերս ծագեցին դրա վառ ապացույցն էին, երբ ինչ-որ պետական օրգան մյուս պետական օրգանից դժգոհ էր: Պետք չէ: Ընթերցողը, հեռուստատեղիտողը, գովազդատուն ինքը թող որոշի՞

ինչը նայել, ինչը ոչ, որ ասուլիսը ինչքան պետք է տեսի, ինչքան պետք է ցուցադրվի եւ այլն: Դրանով մի հեռուստատեսությունը կբարձրավաճի, մյուսը՝ կծախողվի:

-**Շատ է խոսվում «Տիգրան Մեծ» հրատարակչության եւ «Հայմամուլի» մենաշնորհային բնույթի բացասական հետևանքների մասին: Համաձայն եք, որ դրանք բացասական դեր են խաղում եւ եթե այո, ինչ լուծումներ եք առաջարկում:**

-«Հայմամուլը» իսկապես մենաշնորհ ունի, որովհետեւ մամուլի տարածման նոր կրպակներ դնելը, նոր ճանապարհներ սարքելը շատ դժվար է: Այսուհանդերձ, կարծում եմ, որ դա շատ լավ քիզներ կլինի եւ գործարարները պետք է փորձեն:

«Տիգրան Մեծ» հրատարակչությունը մենաշնորհային չէ, կան տարբեր թերթեր, որոնք տպվում են տարբեր հրատարակչություններում: Իմիջիայլոց, պետք է ասեմ, որ թե «Տիգրան Մեծ» հրատարակչության, եւ թե «Հայմամուլի» հետ «Անավտոմ» ունի հոյակապ հարաբերություններ:

-**Ըստ Ձեզ, Հայաստանում կայացած է մամուլի ծառայությունների ինստիտուտը: Դրանք այսօր խանգարում, թե օգնում են լրագրողների աշխատանքին:**

- Արդեն նշեցի, որ դրանք խանգարում են լրագրողի աշխատանքին եւ չնչին բացառություններով խնամիների, ծանոթների, բարեկամների եւ այլ մտերիմների տեղավորման տեղ են:

-**Ի՞նչ ջանքեր է գործադրում Ձեր թերթը Հայաստանում ճիշտ ժողովրդավարության զարգացմանը նպաստելու համար:**

-Թերեւս, իմ ամբողջ դասախոսությունը այդ հարցի պատասխանն էր:

-**Քրահրատարակչության եւ տեղեկատվության վարչության գործունեությունը ներկայումս որո՞ն է: Ըստ Ձեզ, այն արդյունավետ է գործում:**

-Ճիշտն ասած, դժվարանում եմ ասել, ինչի համար է այդ վարչությունը ստեղծվել: Երեւի այն ժամանակ պետք էր պաշտոն տալ շատ լավ բանատեղծ եւ այն ժամանակվա իշխանության մտերիմ Գրայյա Թամրազյանին, ու դրա համար հորինվեց տեղեկատվության եւ զրահրատարակչության մախարարությունը: Չեմ կարծում, որ վարչությունը այս պայմաններում ինչ-որ շատ կարեւոր դեր պետք է խաղա եւ ժամանակի ընթացքում նույնպես կլուծարվի:

-**Ի՞նչը կարող է նպաստել լրագրողների շրջանում գործող մերթն գրաքննության վերացմանը:**

-Ինձ թվում է ընդհանուր հասարակության, տնտեսության, անկախ գործատուների, գործարարների ինստիտուտների զարգացումը, լրագրության համար անկախ աղբյուրների գոյացումը կիսբանի նաեւ լրագրողների ազատությունը: Սեկը չի կարող մատել, ասեմք, համակենտրոնացման ճամբարում եւ ներքուստ ազատ լինել: Նման բաները հակասում են միմյանց:

-**Ի՞նչպիսի կոնկրետ առաջարկներ ունեք ինֆանտիլիզմի վերացման համար:**

-Կարծում եմ, որ քարոզչությամբ, ինչ-որ արժեքներ մատուցելով, զարգացած երկրների փորձը ցույց տալով մենք պետք է մերը կատարենք: Բայց, ասեմք, Ազգային ժողովը պետք է կատարի իր առաքելությունը: Ենթադրենք արժեթղթերի շուկայի մասին օրենքը եւ ողջունում եմ, իսկ եթե Աժ-ն ընդունի թոշակառուների թոշակը տասն անգամ բարձրացնելու օրենք, որը միել է նույն է, թոշակառուներին այդպես էլ չեն տա, եւ չեն ողջունի, որովհետեւ դա մաքուր պոպուլիզմ կլինի: Ինֆանտիլիզմը պետք է վերացվի համակարգային փոփոխություններով, որոնք պետք է կատարեն իշխանության բոլոր թեւերը:

-**Կարող է արդյոք Ստեփանակերտում նախագահի նկատմամբ կատարված մահափորձը խորացնել քաղաքական ճգնաժամը Հայաստանում:**

- Անշուշտ, ճգնաժամը կխորանա: Քանի դեռ կա այն համակարգը, որը հիմնված է ռազմական, այսինքն գեներալների իշխանության վրա (այդ համակարգը ստեղծվել է 1995-96 թ.), կլինեն մնացած ցնցումներ: Դրանցից խուսափելու ձեւը միմիայն հասարակության աջակցությունը վայելող իշխանություն ստեղծելն է Հայաստանում եւ Արցախում:

-**Ինչպե՞ս կմեկնարկենք այն փաստը, որ մամուլի միջոցները կադապարվում են միայն քաղաքական շրջանակներին առնչվող անձանց մտածողությամբ, իսկ հասարակական լայն շրջանակները չեն ընկալում, յուրացնում մատուցվող ինֆորմացիան: Չի՞ ստացվում, որ թերթերն աշխատում են մեղ շրջանակի համար:**

-Միանգամայն համաձայն եմ: Աշխատում ենք դրանից ազատվել, բայց շատ դժվար է: Իսկապես պետք են նոր տիպի լրագրողներ, երեւի՝ նոր տիպի թերթեր, որոնք կկարողանան այդ կադապարներից դուրս գալ:

ՀԻՆԳՇԱԲԹԻ, ԱՊՐԻԼԻ 20-ԻՆ



«Դասախոսությունների շարք» ծրագիր

Բանախոս
ՀՀ Ազգային ժողովի փոխնախագահ

Տիգրան Թորոսյան

Թեմա. «ՀՀ ներքաղաքական
իրավիճակի վերլուծություն»

Ապրիլի 20-ին, ժամը 18:30-ին

Հայաստանի ամերիկյան համալսարանի
փոքր դահլիճում

Դասախոսությունը կընթանա հայերենով՝ անգլերեն
համընթաց թարգմանությամբ

Մուտքն ազատ է



ԲԱՆԱԽՈՍ


«Դասախոսությունների շարք» ծրագրի տեղեկագիր
Հայաստանի ամերիկյան համալսարան
Հատուկ դասընթացների բաժին

URL:// www.aua.am/aua/extens/lectures

Ծրագրի համակարգող՝
Հրայր Չորյան

Հայաստանի ամերիկյան համալսարան
ՀՀ, ք. Երեւան, Բաղրամյան 40
հեռ. 27-16-58

Հասցեատեր՝



Հայաստանի աներիկյան
համալսարանի
հատուկ դասընթացների բաժին

Դասախոսությունների շարք ծրագիր

ՀՀ Ազգային Ժողովի փոխնախագահ

Տիգրան Թորոսյանը

ներկայացնում է

«ՀՀ ներքադարական իրավիճակի վերլուծություն»

Հինգշաբթի, ապրիլի 20-ին,
ժամը 18:30-ին


Հայաստանի աներիկյան համալսարանի
փոքր դահլիճում

Դասախոսությունը կընթանա հայերենով,
անգլերեն հանընթաց թարգմանությամբ

Սուտքն ազատ է



Լրացուցիչ տեղեկությունների համար զանգահարել՝ 27-16-58



Հայաստանի ամերիկյան համալսարանի հատուկ դասընթացների բաժին

Անգլերեն յոթ փուլերով, 2000թ.

Յուրաքանչյուր փուլի

տևողությունը՝ (I, III, V, VII փուլեր) մայիսի 29-ից մինչև հուլիսի 28-ը, երկուշաբթի, չորեքշաբթի և ուրբաթ, ժամը՝ 17:00--20:00
(II, IV, VI փուլեր) մայիսի 30-ից մինչև հուլիսի 29-ը, երեքշաբթի, հինգշաբթի օրերին ժամը՝ 17:00--20:00 և շաբաթ օրը ժամը՝ 14:00-17:00

վարձը՝ 130 ԱՄՆ դոլարին համարժեք դրամ (ներառյալ ԱԱԳ)

Անգլերենն աշխատանքում (երկու փուլերով)

Յուրաքանչյուր փուլի

տևողությունը՝ (I փուլ) մայիսի 30-ից մինչև հուլիսի 29-ը; երեքշաբթի օրերին, ժամը 18:30-ից 20:30, շաբաթ օրերին ժամը՝ 15:00--18:00

(II փուլ) մայիսի 31-ից մինչև հուլիսի 29-ը; չորեքշաբթի օրերին, ժամը 18:30-ից 20:30, շաբաթ օրերին ժամը՝ 15:00--18:00

վարձը՝ 75 ԱՄՆ դոլարին համարժեք դրամ (ներառյալ ԱԱԳ)

Գործարար հաղորդակցություն անգլերենով

տևողությունը՝ մայիսի 30-ից մինչև հուլիսի 1-ը երեքշաբթի, հինգշաբթի օրերին, ժամը՝ 18:30--20:30, շաբաթ օրերին ժամը՝ 10:00--12:00

վարձը՝ 50 ԱՄՆ դոլարին համարժեք դրամ (ներառյալ ԱԱԳ)

TOEFL-ի նախապատրաստական դասընթաց

տևողությունը՝ ապրիլի 26-ից մայիսի 26-ը երկուշաբթի, չորեքշաբթի և ուրբաթ, ժամը՝ 17:00--20:00

վարձը՝ 75 ԱՄՆ դոլարին համարժեք դրամ (ներառյալ ԱԱԳ)

- **Դասընթացների գրանցումը և վճարումը տեղի կունենան Հայաստանի ամերիկյան համալսարանի (ՀԱԳ) 19ա սենյակում, ժամը 09:00-ից մինչև 17:45**
- **Յուրաքանչյուր դասընթացում կընդգրկվեն նվազագույնը 10, առավելագույնը 15 դիմորդներ**
- **Բացի անգլերենի առաջին փուլից, անգլերենի մյուս դասընթացներում ընդգրկվելու համար դիմորդները պետք է հանձնեն անգլերեն լեզվի քննություն, որը տեղի է ունենում յուրաքանչյուր ամսվա առաջին աշխատանքային օրը, (առաջիկան՝ մայիսի 1-ին), ժամը 13:00 ՀԱԳ-ի փոքր դահլիճում. քննության վճարն է 500 դրամ**
- **Փուլերը հաջորդաբար շարունակվելու դեպքում գործում են գեղչեր**

Լրացուցիչ տեղեկությունների համար դիմեք

ՀԱԳ-ի 19ա սենյակ ժամը 09:00-ից մինչև 17:45 կամ զանգահարեք 27-16-58